

Sefer-begova džamija napadnuta po 50. put!

22/10/2009 12:37 by Administrator

Vjernici kamenovani dok su klanjali jacija-namaz. Sefer-begova džamija u Banjoj Luci kamenovana je preksinoć oko 19.45 sati, u vrijeme dok su u njoj vjernici klanjali jacija-namaz. Srećom, u incidentu nije bilo povrijeđenih, ali je pričinjena materijalna šteta na objektu, potvrđeno je jučer "Dnevnom avazu" u Medžlisu Islamske zajednice Banja Luka.

Počinilac je otvorio ulazna vrata, a potom u džamiju bacio kamen kroz polustaklena vrata koja vode do unutrašnjosti.

- Nakon praska staklo je počelo padati po vjernicima. Kamen umalo nije pogodio jednog vjernika, ali je na svu sreću udario u stub. Izašli smo ispred džamije, ali nikoga nije bilo. Pozvali smo policiju i odmah su došli na uviđaj. Prema našim statistikama, ovo je 50. put da je napadnuta ova džamija, samo od 2004. godine, kada je otvorena. Nikada nismo dobili povratne informacije u policiji, a nije razriješen nijedan napad. Policija nije efikasna, u strahu smo. Vjernici se pitaju šta je sljedeće - rekao nam je glavni imam džamije Mersudin ef. Hodžić.

Kako nam je jučer potvrđeno u banjalučkoj džamiji, policija traga za počinocima ovog vandalizma. Sefer-begova džamija jedna je od najstarijih i najznačajnijih u Banjoj Luci.

Autor: V. S.

Izvor vijesti: Dnevni Avaz